



UKA 2016/94

22. september 2016

Iddimanggiu Bianco

Uunga siunnersuut: Tikeraat ornittagaannik takornariartitsivinnillu pilersitsisarneq ingerlatsinerlu pillugit Inatsisartut inatsisaat nr. xx, xx. xxx 2016-imeersoq
(Inuussutissarsiornermut, Suliffeqarnermut, Niuernermet Nunanullu Allanut Naalakkersuisoq)

Takornariaqarnermi ineriartortitsineq ataavartooq atorfissaqartipparput. Takornariaqarneq nunatsinni inuussutissarsiornermi pingaaruteqarluinnartut ilagilluinnarpaat. Takornariaqarnermi pilersitsisusaaavoq suliffinnik, aningaasatigut kaaviiartitsisusaaq aammattaaq illoqarfinni nunaqarfimmilu ineriartornermi pingaaruteqarluinnartut ilagilluinnarlugu.

Ullutsinnilu takornariaqarnerup nunatsinnit ingerlanneqarnera isigigaanni allannguissamut aamma ujartuisusaaavugut, nunaqavissut aamma periarfississagutsigit takornariaqarnikkut ineriartornermi peqataalluarnissaannik.

Taamaattumik nunaqavissunut takornariaqarnikkut ineriartortitsinissamut periarfissiinissaaq aqutissiuunneqarnissaa pingaaruteqarluinnarpoq. Tamannalu ilaatigut ilinniarnikkut ingerlanneqarluarsinnaasoq Inuit Ataqatigiit isumaqarpugut. Kujataanimi ilinniarfimmik ajunngilluinnartumik peqarpugut inuaqatigiinni atorluarnerusinnaasoq aamma takornariaqarnikkut ineriartornermi.

Takornariat ornittagassaat nunatsinniittut pilersinneqarniartuni Inuit Ataqatigiinni suleqataanissarput qilanaaraarput. Orninneqartartussammi (besøgscentre) pilersinneqarnissaanni sumiiffiit assigiinngissusaanik ersersinneqarsinnaaneranut periarfissatsialaavoq, takornariaqarnernikkut aqqissuussinermi iluaqutaalluurtussamik.

Taaneqartut ilagaat Isfjordcenter Ilulissaniittoq. Inuit Ataqatigiinnilu takorloortakkat ilagaat Nuummi National Galleri pilersinneqarsinnaasoq, nuna tamakkerlugu isiginnittumik, oqaluttuarisaaneq, eqqumiitsuliorneq allarpassuartigullu inerisarneqarsinnaasoq takornarianut nunatsinnullu iluaqutaalluurtussamik.

Tunami takorloorneqarsinnaavoq piorsarsimassutsikkut pisuussutsimik takutitsisoq takornarianut orninneqarsinnaassassoq. Nalunngilarpullu ullutsinni Tunumi takornariaqarneq ukiorpassuannortuni misilittakkat inerikkiartornikuusut Islandimut qaninnerput iluaqutigilluinnarlugu. Tamannalu periarfissarpassuarnik ammaassinerusoq atorluarnerusinnaavarput. Nunarput ilaa aamma eqqarsaatigalugu.

Kujataanilu Great Greenland takornariaqarnermut misilittagaqalersimasooq aamma atorluarneqartariaqarpoq, ilaatigut takornarissat ornittagaattut isiginiarneqalersinnaalluni.

Nunatsinni takornariaqarnikkut nutartigassaqarpugut nunanut allanut naleqqiullugu. Assersuutigalugit illoqarfiup assiganik allagarsiisarneq, aqutissanik allagarsiisarneq aammalu takornarianut paasissutissiisarfimmi allagarsiinerit (info skilte). Tamakkulu takornarianut

ajornannginnerusumik nunatsinni illoqarfinni nunaqarfinnilu angalariaaseq oqinnerusooq atugassaalissagaluarpoq. Nunanilu misilittakkat nunatsinni atorluarnerusariaqarpagut.

Misissuinerimmi takutippaat ornitaq aaqqissorluagaq avammut ussassaarutaalluarsinnaasoq, takornariaqarnerulersitsilluni, illoqarfinni nunaqarfinnilu takornariaqarnikkut tunisassiornermi ineriartuutaalluni pitsanngorsaataalluartsuusoq. Taamaattumik innuttaasut peqataatinneqarluarnissaanut peqqutissaqarluarpugut.

Takornariaqarneq ukiuni amerlasuuni angallannikkut pilersikkiartuaarnikuuvoq sumiiffinni assigiinngitsuni nunatsinni. Massakkullu angallannerup ineriartortinneqarniarnera nunatta ilaanni allatorluinnaq isikkoqarpoq. Tamannalu takornariaqarierisunut ilungersunarluinnartumik isigisassaavoq, angallannermi takornariaqarnerup iluani unamminartuartut ilagiuannarsimavaat.

Angalanermilu allannguinerup kingunerisarpaa takornariaqarnikkut nalimmassaaneq suliaq annertoq ingerlanneqartarneri, takornariaqarierisut mikippata angippataluunniit tamanna suliaasatut annertuutut akisussaaffiuvoq unamminarluinnartoq. Taamaattumik angalariaaseq eqqartorneqarnissaa aamma takornariaqarnikkut isiginnittumik pisariaqarluinnarpoq.

Naalackersuisut siunnersuutaanni Namminersorlutik Oqartussat akisussaasuusut ersarittumik taaneqarpoq. Taamaalilluni Kommunit katersugaasiviillu suliaannut allaanertut taaneqarluni. Tamanna Inuit Ataqtigiinniit ippinnartut isigaarput, tassami kommuneni katersugaasivinnilu suliat tamakkorluinnaat ingerlanneqarmata takornariaqarnerup iluani.

Isumaqarpugummi tikeraat ornittagaannik pilersitsinissami isikkulersueqataasussat tassaasussaasut takornariaqarnikkut misilittagallit ukiorpassuarnilu ineriartortitsinikut.

Taamaattumik takornariaqarnerup ineriartortinnerani allorassaaqtigiinneq pingaaruteqarluinnartoq, takornariaqarierisullu ineriartortissimasaat uunga suliamut pilerinaateqarluinnartut pingaartipparput, kommunemiippat, katersugaasivimmiippat inuinnarniluunniit.

Uanilu suliami innersuukkusunnarpoq inuussutissarsiornermut ataatsimiitsitaliami sinaakkutissanik pilersitsinermi eqqartorluarneqarnissai pingaaruteqarluinnartutut misissoqqissaarinikkut aaqqissugassaasoq.

Taamasillugu Inuit Ataqtigiinniit una suliaq inuussutissaqarnermut ataatsimiitsitaliamut sukumiisumik suliaassanngorlugu innersuukkusupparput.